

Friday, August 28, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



HANDHOLDING SCHEME

Mizoram sorkar flagship programme Bana Kaih Scheme hnuaiah loan la tura thlan progress partner 742 zinga 483 hnenah loan cheng nuai 4,377 pek a ni tawh a; mi 3,109 hnenah Chief Minister Special Package cheng nuai 2,259 pek a ni tawh.

Assembly Session neih zawh takah Chief Minister Pu Lalduhoma chuan MNF member Pu K Laldawngliana zawhna ziaka chhangin, Bana Kaih Scheme hnuaiah loan la tura thlan progress partner 742 zinga 483 hnenah loan cheng nuai 4,377 pek a ni tawh thu a tarlang a; Chief Minister-in a tarlan danin, Bana Kaih hnuaia loan la zingah hian cheng nuai 50 la mi 3 awmin, cheng nuai 40 atanga 50 inkar la mi 14, cheng nuai 30 atanga 40 inkar la mi 19, cheng nuai 20 atanga 30 inkar la mi 26, cheng nuai 10 atanga 20 inkar la mi 84, cheng nuai 1 atanga nuai 10 inkar la mi 330 leh cheng nuai 1 hnuai lam la mi pasarih an awm a ni.

CM Special Package hi mi 3,109 hnenah pek a nih tawh thu tarlangin Pu Lalduhoma chuan, heng mite hnenah hian cheng nuai 2,259 pek a ni tawh a, chawhrualin mi 1 hnenah Rs 72,674 zel pek ang a ni.



MPCC

Congress vice president Pu C Ngunlianchunga, MLA chuan Chief Minister Pu Lalduhoma chu ram tana Pa nih tling loah puhin, rorellai ZPM party chu ‘kan ti lo ang’ an tihte ti leh si an nih thu a sawi.

Pu Ngunlianchunga chuan vawiin khan an party chhung inkhawmah thu sawiin, Assembly Session neih zawh takah Mizoram State human Right Commission leh ILP chungchangah Chief Minister Pu Lalduhoma chuan hlauih a ngah lutuk niin a sawi a; Pa berin fate hnenah hlauih tur insawi thaih reng hi a tha lo a, chumi avang chuan at huai tur erawh a ni lo. Pa chuan mipui zinga sawi tur thliar hran athiam tur a ni a, hriat zawng zawng sawi chhuah hi a tha lo, a ti.

ZPM sawrkar chu inthlan dawna an insawi loh anga awm, ‘kan ti lo ang’ an tihte ti lehshiah puhin Pu Ngunlianchunga chuan, electric bill tih san loh an tiam pawh an intiam loh danin an awm tih a sawi a; ‘Kan ti lo ang’ an tih pawh ‘kan ti ang’ tiin an inlet ta, a ti a, sorkar chuan mipui a bum nasa tih a sawi.



MNF

MNF Adviser Pu Rashik Mohan Chakma, MLA chuan Chief Minister Pu Lalduhoma chu thil hrechiang loa thu sawi thinah puhin, MNF party chuan mipui tana tha lo tur chu an do zel dawn tih a sawi.

Vawiin khan MNF party chhung inkhawmah Pu RM Chakma hian thu a sawi a, Chief Minister Pu Lalduhoma chuan thil hrechiang loin a duh duh a sawi niin a sawi a; thil hre chiang loin a duh duh a sawi mai a, thudiklo hmangin zoram hi a kai hruai a ni, a ti a; Zoram mipuite hian hetiang thudiklo sawi ching leh sawi anga awm lote hi an hnawl ngam a tul a ti.

Pu RM Chakma chuan Assembly Session neih zawh taka thil thleng hrang hrangte kha MNF party leh opposition-te hlawhtlinna a nih thu a sawi a; smart meter chungchangah mipui tam tak tana harsatna tawh an sawi chhuahte chu sawrkar mek ZPM party-ten an bengkhawn duh lo tih sawiin, sorkar hian smart meter hi hman chhunzawm a tum a. Mahse, MNF party chuan mipui tana tha lo chu a do zel dawn a ni, a ti bawk.



KOLASIB KVK

Kolasib KVK ten Farmer thlan bik mi 20 te hnenah Buh phunna, hlo thlawhna leh buh chilna khawl vawiin khan an pe.

He hun KVK Kolasib Conference hall a neih ah hian KVK Kolasib Scientist and Head Pi Michelle C Lallawmkimi chuan khawl an pek te hi Indian agriculture research institute, New Delhi ten Kolasib KVK te tana a thlawna an rawn pek a nih thu sawiin, heng khawl te hi a vaiin cheng nuai 40 man hu vel a nih thu a tarlang a ni.

Vawiin a khawl an semchhuah te hi ke hmanga Buh vuaka khawl, Buh phunna mihringin a hnuh chu leh Hlo thlawhna nawr chi niin, hei bakah hian Sangha khawi tu Farmer thlan bik mi 3 hnenah Sanghachi an pe bawk.

